

FORUM FOR AFRICAN WOMEN EDUCATIONALISTS

Mpampianatra 3 hisolotena an'i Madagasikara any Nairobi

Tsy mahasakana ny asa efa natao nandritra ny 15 taona ny fisian'ny covid-19, asa izay sahanin'ny Forum for African Women Educationalists, izay atsy Nairobi Kenya ny foibeny, sady manana rahateo sampana eto Madagasikara, tsy miaramiasa ihany koa amin'ny Ministeran'ny Fanabeazam-pirenena. Misongadina ny fanabeazana ny ankizy vavy mba hahatoky tena, eo koa ny famporisihana azy ireo ho tia ny taranja toy ny Matematika, tsy atao ambanin-javatra koa anefa ny fampihenana ny fitsoahana andaharana an-tsekoly eo amin'ny ankizy vavy ihany. Fantatra fa misy ny fifaninanana nampanaovina ny mpampianatra, ka hamaliana ny fanontaniana manao hoe : "Tantarana ny tetik'asa



Nairobi renivohitr'i Kenya, ho ambohipihaonan'ny mpanabe vehivavy ato ho ato.

nataonao nandritra ny fiatrehana ny covid-19". Fantatra fa 20 no voasivana tany amboalohany tamin'ireo mpampianatra nandray anjara, lasa ho 6 izany rehefa natao ny si-

vana manaraka ary 3 sisa taorian'ny sivana farany, ka ireo 3 ireo no hisolotena an'i Madagasikara mandritra ny famaranana lehibe hotontosaina any Nairobi Kenya. Firenena 5

no hiatrika izany ahitana an'i Gabon, Madagasikara, Senegal, Burkina Faso ary Tchad. Hahazo fiofanana any Frantsa izay hibata ny amboara.

Bema

Finoana Nalahelo ny mpino tany Fort-Dauphin fa tsy afa-nivavaka

Nalahelo ny mpino tany Fort-Dauphin faritra Anôsy ny alahady teo, satria tsy navelan'ny mpitandro filaminana tany an-toerana niditra tao am-piangonana. Alahelo ny an'ireo mpino FJKM tany amin'ny renivohitry ny faritra Anôsy, fa tsy navelan'ny tompon'andraikitra tany an-toerana hanaovana fotoampivavahana ny fiangonana FJKM salema Vaovao, sy ny FJKM Betlehema Ampamakiambato, na dia vonona



Ny fanakanana ireo mpino tsy hivavaka nataon'ny mpitandro filaminana tany Taolagnaro.

hanaja ny fepetra ara-pahasalamana rehetra aza ireto farany. Ny mahagaga hoy ny fitarainana voaray avy any an-toerana ny tsena, sns... tsy vitan'ny mpitandro filaminana ny manaramaso azy hanaraka ny fepetra, nefa ny fiangonana hakana fampaherezana hidiana. Tokony hisy hoy ireo mpino ny mizana tsindrian'ila amin'ny fanapahan-kevitra raisin'ny fitondrana.

Niaina

Lâlana sy sisin-dâlana nolavahana Mila haverina amin'ny laoniny

Misy asa tanterahin'ny orinasa Jirama amin'ireo lâlana amin'ny toerana sy tanàna samihafa amin'izao fotoana izao. Ahitana izany, ohatra, iny lâlana miakatra ny vohitr'itaosy sy Ambohidrapeto iny. Niaraha-nahita ny fahavitan'ny lâlana miainga eo amin'ny tetezan'Ampasika tonga hatrany amin'ny Cité Itaosy, izay nataon'ny orinasa sinoa efa vita am-bolana maro, na aman-taonany mihitsy aza izao. Ankehitriny anefa, ny asa ataon'ny Jirama izay mikasa hame-traka fantsona lehibe maro, dia miroso amin'ny fandavahana ireo sisin'arabe eny an-toerana hahafahana manatanteraka izany. Ny asa atao tsy maninona, fa mety ilain'ny vahoaka ny hahavitan'izany amin'ny famatsian-drano ho azy, ohatra. Fa ny mampieritritra ny

maro dia ny amin'ny firenany ireny sisin-dalana nolavahana ireny amin'ny laoniny. Azo lazaina ho vita tsara sy mafy ihany ny nanamboarana azy ireny talohan'izao, na dia teo aza ny fahataran'ny fahavitan'ny asa tamin'izany fotoana izany. Nam-

pisy endrika ihany koa ny tanàna izany. Ho vitan'ny Jirama ve ny famerenana amin'ny laoniny izany, ary ho vitany tsaratsara koa noho ny teo aloha ve? Izay no andrasan'ny mponina. Raha ny fahitana ny asa ataon'ny Jirama eny

amin'ireny arabe na sisin-dalana ireny nandritry ny taona maro, amin'ny ankabony, dia indraindray tsy nahafapo ny mponina mpandao hetra sy ny mpampiasa lalana. Hita soritra miavaka mandrakariva ny fanamboarana nataony, na dia misy aza ny ezaka famerenana azy amin'ny fandrakofana tara na simenitra. Ny tsy aritra kely ihany koa dia manohintohina ny fifamoivoizana ny asa ataony toy izao. Niseho izany tamin'ny fitohanana sy ny fihisan'ny fifamoivoizana teny amin'ny miakatra an'Ambonisoa mihazo an'Anosimasina sy Ampasika iny omaly. Misy fiantraikany any amin'ny fihariana sy ny asa amandraharam-bahoaka anefa izany toe-javatra izany.



Tokony hiverina ho toy izao ihany ny lalana lavahan'ny Jirama eny amin'ny faritra Itaosy iny.

Radafy

Resaka vakoka sy tantara Tsy ampy ny fampivoarana ny Mozea eto Madagasikara

Firenena manana ny maha izy azy ity Nosintsika ity raha eo amin'ny lafiny ara-tantara sy vakoka. Anisan'ny fitehirizana sy fikolokoloana io tantarany sy ny vakoka io ny Mozea. Na eo aza ny eny Anatirova, izay manahirana be ihany ny mieritritra azy ankehitriny, noho ny fihetsiky ny fitondrana nikitika, mba tsy ilazana hoe nanosihosy, ny maha izy azy marina madio mangarahara vao tsy ela izay, dia eo ihany koa ireo toeran-kafa maro eto Antananarivo sy ny manodidina na any amin'ny faritra samihafa manerana ny Nosy. Anisan'ny maneho sy mitana ny tantara nisy teto amin'ny firenena ireny Trano na Mozea maro samihafa ireny. Fitehirizana ny vakoka na ny zavatra maro isan-karazany nampiasaina fahiny tamin'ny toerana na faritra iray ireny Mozea ireny. Mazava loatra, fa tsy tokony hisy velively raketina na tehirizina ao anatin'ny avy any ivelany manampy ireo an'ny fahagola ao. Tsy tranombakoka intsony izy amin'izay fotoana izay, fa efa mifangaro tsy madio intsony. Hamitaka tanteraka ny taranaka fara aman-dimby ihany koa tsy hahalala ny tantara marina ny fanaovana izany, ary fanetriben'ny firenena ny olona sahy minia manao izany. Ankoatra ny amin'ny fiarovana ireny Mozea ireny, izay tena tokony ho laharam-pahamehana ny amin'izany, dia anisan'ny iray lehibe ihany koa amin'ny ezaka tokony hotanterahina ny fampivoarana sy fampiroboroana azy. Tsy hita misongadina anefa izany eto amin'ny firenena amin'izao fotoana izao. Porofon'izany, tsy maro amin'ny Malagasy no mazoto sy tena tia mitsidika ireny toerana ireny. Tsy amin'ny fanaovana Collisée akory no hamparisika azy amin'izany. Hadi-soan-kevitra mihitsy izany, ary vao mainka aza hampihemotra azy hankeny amin'ireny toerana ireny amin'ny finivany te hahalala ny tantaran'ny firenena, satria misy ny toeran-kafa azy haleha ihany koa. Ny tsikaritra koa hatreto, dia tsy misy mihitsy ny fanoanana sy fiaraha-miasa amin'ireo olom-pirenena manana vakoka mendrika ho fantatry ny mpiray tanindrazana. Misy olona toy izany eto ary hita ho miasa ireny izy ireny, noho ny fitiavany manokana vakoka mampahafantatra ny vakoka ny eo am-pelatanany. Misy aza manafina ny any aminy mihitsy noho ny tsy fahazoana antoka amin'ny fiarovana azy. Izay no ilazana mazava fa tsy misy na tsy ampy mihitsy ny fampivoarana ny Mozea, sy ny tranombakoka eto amin'ny firenena. Isan'ny iray mbola ilazana ihany koa ny lesoka na ny tsy fahaiza-mitantan'izao fitondrana ankehitriny izao izany.

Aris

Taratasin'ny mpamaky

Taratasy ampitaina amin'ny gazety Ny Valosoa izao manaraka izao, mba ho fantatry ny vahoaka, indrindra ny mpitondra. Manan-janaka mianatra amin'ny sekoly tsy miankina sy sekolim-panjakana izahay. Efa tafahoatra loatra ny fakana vola ataon'ny fanjakana sy ny olom-panjakana, nefa izahay efa tena sahirana fa very asa amin'izao. Lazaina fa tsy andoavam-bola ny fampidirana amin'ny fanjakana araka ny voalazan'ny filoha sy ny minisitra, kinanjo nony lasa ny telo volana dia nakana 3 na 4 alina isan'ankizy izahay. Lazaina fa tsy andoavam-bola ny fiatrehana fanadinam-panjakana, kinanjo dia nitaky vola ihany ny CEG hanaovan'ny zanakay fanadinana BEPC, ka nandao 3 arivo ariary. Nanao visite ny zanakay hanao Bac dia takian'ny mpiasam-panjakana CSB2: 500 ariary tsirairay, nefa tena asany izany. Re fa hanao examen blanc CEPE sy BEPC ato ho ato ny CISCO dia tsy maintsy haka 2000 ariary isan'ankizy, na dia mahay kajy aza ny rehetra, fa raha taranja fito, ka 100 ariary ny photocopie dia tokony ho 700 ariary. Tsy maintsy maka tombony foana ve ianareo mpiasam-panjakana ? nefa ianareo anie mandray vola feno hatrany isambolana, na eo aza ny valanaretina e! Tena tsy mahalala voky ve ianareo ary iza anefa ireo hakanaro vola isan'andro, fa tsy ny madinika hatrany ? Dia mangina koa ianareo mpitondra fanjakana, minisitra, ao amin'ny CISCO manoloana izany fa tsy miteny mihitsy ? Tena firaisana tsikombakomba amin'ny ratsy anie izany e !

**Rakotonaivo
Ray aman-drenin'ny mpianatra
Isotry, Antananarivo**